

Արտենի

Մակերես՝ 1.186կմ²

Բնակչություն՝ 3386

Գյուղ Թալինի տարածաշրջանում, Թալին քաղաքից մոտ 14կմ հարավ-արեւմուտք: Մարզկենտրոնից գտնվում է 63 կմ հեռավորության վրա: Նախկինում ունեցել է Բաղուբլի, Բողուբլու, Բուղուտլու անվանումները: Արտենի է վերանվանվել 1950 թ.-ին:

Գյուղից 2.5կմ հյուսիս-արեւելք գտնվում է Արտին լեռը, որտեղ հայտնաբերվել են հին քարե դարի բնակավայրեր, գործիքներ եւ զենքեր:

Գյուղը գտնվում է ծովի մակարդակից 1200 մ բարձրության վրա:

Կլիման մերձարեւադարձային, չոր ցամաքային է, շոգ ու չորային ամառներով, չափավոր ցուրտ ձմեռներով: Հուլիսյան միջին ջերմաստիճանը տատանվում է 25-26-ի սահմաններում, հունվարյանը՝ -4 է: Տարեկան մթնոլորտային տեղումները կազմում են 350 մմ: Բնական լանդշաֆտները չոր տափաստաններ են, որոնք ոռոգման արդյունքում ձեւափոխվել են կուլտուր-ոռոգելի լանդշաֆտների: Հողերը ոռոգվում են Թալինի ջրանցքի ջրերով:

1926 թ.-ին ունեցել է 59, 1939 թ.-ին՝ 49, 1959 թ.-ին՝ 1325, 1970 թ.-ին՝ 2932, 1979 թ.-ին՝ 3180 հայ բնակիչ, որոնք եկել են Արթիկի եւ Թալինի շրջանների գյուղերից: Համայնքի բնակչությունը կազմում է 3801 մարդ, որից 48% տղամարդիկ են, իսկ կանայք՝ 52%: Մինչաշխատունակ տարիքի բնակչությունը կազմում է 36%, աշխատունակ տարիքի ներկայացուցիչները՝ 52%, հետաշխատունակները՝ 12%:

Գյուղն ունի 1320 տնտեսություն: Ունի հիվանդանոց, երկու դպրոց, գրադարան, նաեւ գինու գործարան: Համայնքի տարածքի մոտ 45% սեփականաշնորհված հողերն են: Հողահանդակները հիմնականում օգտագործվում են որպես վարելահողեր, մշակում են հացահատիկ, կերային, բանջարաբոստանային կուլտուրաներ, պտուղներ: Պաշտոնային հողերի մեջ 180 հա վարելահողերն են, բազմամյա տնկարկները՝ 15 հա, առտավայրերը՝ 1145 հա:

Զբաղվում են խոշոր եւ մանր եղջերավոր անասնաբուծությամբ, թռչնաբուծությամբ:

Համայնքի հիմնախնդիրների մեջ կարեւորվում է խմելու եւ ոռոգման ջրի ջրագծերի, գյուղամիջյան ճանապարհների վերանորոգումը: